

# Succumber en l'atgna domena – la politica da famiglia

Pcd batta vinavant per geniturs ed uffants

■ (anr/vi) **La pcd sto succumber en la politica da famiglia. Cler e net ha il pievel svizzer refusà ier l'iniziativa «nagina taglia sin supplements per uffants». Munta quai ch'era la segunda iniziativa da la pcd fa ina cumpitgarola?** «Nus encunter il rest dal mund», resumescha *Martin Candinas* (pcd/GR) il cumbat da votaziun. Quasi tuttas partidas, il parlament ed il cussegl federal sajan s'exprimids cunter l'iniziativa.

Il blers votants sajan en sasez persvadids ch'i fiss da sustegnair las famiglias, di il cusseglier naziunal. Ma il ferm franc svizzer cun las discussiuns davart lavur curta e las smanatschas dals directurs da finanzas cun pachets da spargn hajan procurà per malsegirezzas.

## Encunter il «strof» da maridar

La clera refusa dad ier na munta per Candinas dentant betg in signal negativ per la segunda iniziativa da famiglias da la pcd. L'iniziativa per abolir l'uschenumnà «strof» da maridar vegnia numnadamain sustegnida dal cussegl federal. E la dregira federala haja admonì gia avant trent'onns en quest connex. La pcd s'engaschia vinavant per la famiglia, di Candinas. El sez s'engascha per in congedi da babs. Sia collega da fracziun *Ruth Humbel* batta persunter ch'uffants na stoppian pajar naginas premias da malsaus.

## Il stadi ha fatg bler per famiglias

Per ils adversaris ha l'iniziativa fatg naufragi perquai ch'ella na saja betg sta-

da persadenta. «Ils votants han vesì che l'iniziativa distgargiass mo a prima vista las famiglias», di *Ruedi Noser* (pld/ZH). Ma l'iniziativa na porschia naginas schliaziuns persadentas. En cas d'ingea fissan creschidas las taglias sin champ communal. «Il stadi haja plinavant fatg bler per las famiglias ils ultims onns.»

Ord vista da Noser haja la populaziun era chapì che la pcd fetschia cun sia iniziativa mo ina champagna en vista a las elecziuns federalas da l'atun. Il ferm franc svizzer n'haja giugà nagina rolla, manegia Noser. Decisivas sajan stadas las cifras cotschnas che la confederaziun haja preschentà il favrer. Il pievel sappia uss: «Ils onns grass èn passads.»



Cler e net ha il pievel svizzer refusà ier l'iniziativa «nagina taglia sin supplements per uffants».